

KA SAMLALABANG



Da U M. M. THAIANG

2003

Rs. 15/-

KA JINGSNGEWNGUH

Nga sngewnguh ia ~~ki~~ kong N. Pasi
bad ia ki khun kiba la noh synniang lang
ha kaba pynmih ia kane ka kot.

Nga sngewnguh ia ka Directorate of
Art and Culture, Govt. of Meghalaya
kaba la noh synniang ha kaba pynmih ia
kane ka kot.

Nga sngewnguh kyrpang ia u Ma.
Shining Star Laloo, Senior Publicity
Officer, Jaintia Hills District, uba la
pule bniah, buh rynth bad pynshluria nga
ha kaba pynmih ia kane ka kot.

M.M. Thiang

SHI KYNTIEN NA U NONGTHOH

Ka Flaka Labang-Nangphyllut ka dei ka bynta jong ka Ri Jaintia (part and parcel of erstwhile Jaintia Empire) ha kaba ka don la u jong u Dolor u Dolor Nongphyllut uba peit uba khmih ia ka Flaka, ia ka tingsynshat khadar bad uba dei ruh u Nongbishat uba ha khlieh duh jong ka Flaka shwa ban pot sha ka Ingshat. Ka Flaka Nongphyllut ka dei kawet na ki khatar Flaka jong ka Ri Jaintia haba ka ri Jaintia ka dang don la u jong U Syiem

Kane ka thain ka don na shaphang lamshater bad lammingi jong ka Ri Jaintia. Ka Flaka ka don hapdeng jong ka 25° E bad 26° North Latitude bad 90° E bad 93° North Longitude ka Jaintia Hills District jong ka Meghalaya. Kane ka thain ka don la kajong ka jingitynnai bad kaba seisoah ha ka liang ka rep ka riang, ha kaba yin pat pyndonkam sboh dawai haduh ka pot ba thoh ia kane ka Kot bad ka long kawet na ki Thain kaba itynnai tam jong ka Jaintia Hills. Ki briew kiba na bai kane ka Flaka ki la wan ban ingoh ia ka, ka pyinkynmawsah ia ki ia ki jingitynnai jong ka ha ka jingim jong ki. Ka long ka jaka kaba seisoah bad kaba sboh bha, kaba iadei bha ha ka rep ka riang kum u kba, u Riewhadem, ka Shriew, u Sying, u Nei-lieh, u Nei-rong u Shynrai, u Krai, u Sohmyngken, u Phanieh, u Phansaw, u Klong, u Pathaw bad ka long ruh ka jaka ka ba iadei bha ha ka Khmang Ryndia, rep laha rep Kynphad bad kiwei kiwei de ki rukom rep. Nalor ba ka long ka jaka

kaba iadei bha ha ka rep ka riang, ka long ruh ka ja ka ka ba iadei bha ban ri jingri kum ki Masi, Blang, Muid, Bangkor, Sniang, Syiar bad kiwei kiwei de kijaitjingri.

Ka khyndew da lade hi ka long kaba seisoh bad kaba sboh bha bad ki Nongrep jong kane ka thain kim pat la shym pyndonkam ia kano kano ka jait sboh dawai haduh ka por ba thoh ia kane ka jingthoh, namar ka mariang dalade hi ka long kaba seisoh. U slap u hap jur ha ka por lyiur bad rang ha ka por tlang. Ha ka por lyuir ka stiinbneng ka shit bha ha ka por Tlang shit ruh em khriat ruh em (moderate climate).

Arphewsan snem mynshwa, shwa ka snem 1980, katba ym pat iaidei bha ka diengkubit kane ka thain ka long ka thain kaba la tap da ka ' lawbah ' lawsan, kaba la tap da ka khlaw kaba rben, ha kaba kiba bun ki Mrad khlaw bad ki sim ki Doh na kylleng ka Ri Jaintia bad na Thor-Assam, ki wan shongrieh ia lade ha kine ki lawbah lawsan. Mynta pat haba la synlen ka Lum ka Pdein ki khlaw ki btab ha ka jingnangroi ki briew kane ka thain ka lakylla bak la bak. Ka jaka ba khlaw mynshwa mynta ka la khuid plen bad kylla sha ki jaka phlang ba jyrngam bad ki Mrad ki Mreng bad ki Sim ki Doh kum ki Hati ki Khla-balieh; ki khla-baiong; ki Khla thohryndia khyrwang; ki Krong; ki Ksar; ki Khlasim; ki Suri-sympet; ki Suri-bhur; ki Niangbri; ki Dngiem; ki Diengkhiat, ki Brai, ki Raikyrton, ki Raiphlang, ki Shriehbalieh, ki Shriehbaiong, ki Shriehwasoo, ki Tngaw, ki Huleng ki, ki Phaidong, ki Iapwiang, ki Sier, ki Skei, ki Bthong, ki Mynthna, ki Masi- prud, ki Ksawkhyndaw, ki

Phyllat bad kiwei de ki jait mrad ki la kynriah jaka bad ki la sdang ban duhjait.

Kumjuh na ka liang ki sim ki doh kum u Rongkohngor (Hornbill), ki Ramakhnah, ki Khlieng-kittylli, ki Khliengkhang, ki Khliengkok-klir, ki Dhoh, ki Khlieng-shakar , ki Khliengshyrtung, ki Khliengiong, Klew, ki Synriang saw, ki Synriang jymgam, Raklawliehkhlieh (white-head bird) ki Rasoi-kdait, ki Rasoi-wamon, ki Moina, ki Labadur , ki Padersnieh, ki Longdkhur jymgam, ki Longdkhur saw, ki Longdkhur sangia, ki Syiar khlaw, ki Nirei, ki Latyud, ki Sim latyap, ki Dok-larniang, ki Saro kseh, Simslein (Lapynda), ki Khruid, ki Niangkhiar, ki Sim-shun, ki Khliengmaha, ki Lashait, ki Simshyntat, ki Sinbain, ki Jitnai, ki Tuta, ki Langlit, ki Shyrwat, ki Paipuraw, ki Rablong stem, ki Rablongstain, ki Sim parkhyndaw, ki Sim sooradang, ki Mukuh, ki Kler -khak, ki Sim makariang, ki Simphlang, ki Pdiawdoit, ki kOh, ki Phreit, ki Simpein, ki Pianglup, ki Beinbong, ki Titpu, ki Yalliap, ki Lakynjar, ki Lara, ki Simdaibei, ki Jalisiaw, ki Sim-um, ki Dit-dit, ki Beintyllok, ki Simsiej, ki Simjyrngam, bad kiwei de ki jaitsim ki la sdang ban duhjait namar ba la syllen ki khlaw ki btab.

Ha jingnangroi nangbun ki briew wat ki mrad kiba shong basah hapoh khyndew kum ki Khan, ki Piahleng, ki Nilein, ki Tangtur ki Yangkheit, ki Brai, ki Khnai ba bun jait, ki Risang bad kiwei ki la sdang ban duh jait. Ia ki Rabbit leilei la khamiar ban lap lait satang ha ki katto katne ki jaka phlang. Ha ki snem kiba kham mynshwa lah ruh ban shem ha kane ka thain ia ki bsein ba bunjait

kum ki bsein iong, bsein iong walieh(Cobra and pythons) ki Rali bsein jyrngam ki bsein khlot, Tyrpit, bseinsooradang, bsein um bsein pyrthoh bad kiwei de ki kynja bsein kum ki rymblen, ki niang sarang, kiba bun hi ki bsein ki dei kiba sniew (poisonous) hynrei la ong ruh ba don ki bsein kiba ym shym la don bih satia kane ka paw na ki bried kiba shah dait bad puh bsein.

Ia kane ka Thain la bynta ha ki arbynta (1) Thain Khlaw (2)Thain lum phlang ha kane ka thain khlaw la tap da ki siej ki Skong ki Shlaw ki Rathern, Ki Rangai, ki Shken bad kiwei de ki jait dieng kiba jyrngam sah baroh shisnem lynter. Ha kine ki Khlaw lah ruh ban shem ia kiba bun jait ki dieng kum ki Lar-i, Latyrngai, ki Dieng Blai, ki Dieng Bti, Laphiang, Diengrai, Kreit, Rakhlaw, Diengmyrsiang, Latangjoo, DiengMuklai, Pliah, Dieng Sning, Lakhar, Skap, Makalein, Sapdern, Diengjap, Tyrpeinkhla, Diengmoo, Kseh bad kiwei de ki jait dieng kaba ki bried ki pyndonkam haba shna ing shna sem.

Kum ka Elaka kaba don artylli ki 'lawkyntang (1) "Ka Khloo Blai Lyngdoh" ha ka Thain Labang bad (2) "Ka Khloo Blai Lyngdoh" ha ka ThainNongphyllut kaba don na rud wah Mynriang ha lynti iaid na Kyarabon sha shnong Laher. Kine ki 'lawkyntang ki dei ki khlaw kiba la ri bad sumar kyndong da ka Raji bad ka Elaka da ki spah spah snem, hynrei ka long kaei kaei kaba sngewsih ba ia ka ' lawkyntang ka ba don ha wah Mynriang la wan pom da ki riew shimet lyngba ki bor District jong ka Karbi Anglong Autonomous Council ha kine ki khyndiat snem kiba la leit noh khlem da burom bad niewkor ia kane ka 'lawlyngdoh 'lawkyntang

tang namar ba dei ka 'lawlyngdoh, lawkyntang jong ki Pnar.

Haki snem kiba mynshwa , hashwa ba kine ki jaka ka shah khliah jubor na ka Ri Jaintia ha ka 13 tarik April (Iaiong) 1951 da ka Sorkar Assam, ka long ka Elaka ka ba tap da ki khlaw kiba rben kham tam ha ki rud wah jong ka wah Mynriang wah Myni wah Myntang bad wah Kupli. Ka jingdon ki khlaw kiba rben ka pyllong ia ki mrad ki mreng bad ia ki sim ki doh ban wan shong bad rieh tngen ha kane ka Thain, hynrei mynta ki laphet rieh shabar kane ka thain.

Ki Labang-Nongphyllut ki dei ki Pnar bad ki khun ki Ksiew jong u Hynniew trep hynniew Skum. Ka ktien Labang- Nongphyllut ka dei ka kyntien ka ba la khot kyllum ia ki nongshongshnong kiba shong ha ka ne ka Elaka bad dei ha poh kane ka Elaka ba la kha ia ka Kordor Lyngdoh bad ia u Paila War.

Ha ka jingiadei bad ka SAMLA LABANG ka dei ka Parom ka ba shu thaw hi bad ringdur da U nongthoh ban Pynsahnam ia ka Thain Labang Elaka U Doloi Nongphyllut ka kyrteng bad ka kur jong ki briew kiba kdew ka kane ka kot kam don jingktah lane don jingiadei badno badno ruh.

M.M. Thāiang

KA SAMLA LABANG

La kha ia ka Kordor Lyngdoh ha ka 20 tarik u Kynthang (kyllalyngkot) jong ka snem 1825. Ha kata ka por u Kat Tamaha, u long u Doloi jong ka Ilaka Labang-Nongphyllut. Ka Ilaka Labang-Nongphyllut ka long kawei na ki Ilaka jong ka Ri Khatar doloi, ia kaba la tip mynta kum ka Jaintia Hills. La kha ia ka ha ka iingtrep phlang barit kaba don halor u lum ba itynnat bha ia uba ki khot u “Lumdeinkynthong” ba don hajan shnong Lumpliah - Mooknor. Wat la ka iingtrep kaba rit pynban ka kper kaba heh bad kaba iar bha. Ki ‘riewtymmen ki juiathuh khana ba kat kum ka khanatang; ka kmie jong ka Kordor ka dei ka Men Phyrnai Lyngdoh bad u kpa jong ka u Woh Jimon Sulip. Ka khanatang ka ong ruh ba ha ka por ba kha ia ka Kordor, ka Men Phyrnai ka la kham met-iaw bad ka la kynjoh sha ka 45 snem ka rta bad u Woh Jibon pat sha ka 50 snem eiei. Ka la long ka jingkmen ka bakhrav ia ki kur ki Jaid, ki kha ki man bad ki lok ki jor haba la kha ia ka . Ia ka Men Phyrnai bad ia u Woh Jibon pat ka la long ka jingkmen kaba palat liam ha ka jingim jong ki ym tang ba ki la ioh khun hynrei kaba la pynhun mynsiem hi Jrut ia ki ba ki la ioh da ka khun Kynthei kaba long ka jaid ka kynja, ka nongiohpateng ia kiei kiei baroh katba ki don bad ka ban mihpli ia ki lashai lashisngi.

Wat la ki long ki baduk ha ka sngi Nohmynsoo (pyrtuid boo ha ki Labang) ka sngi jer kyrteng, ki kmie ki

Ka Samla Labang

kpa jong ka kum ka dak ka jingkmén ki la khot bad lawer lut ia baroh k₁ kur ki jaid, ki kha ki man bad ki lok ki jor ban wan bam khawai ha iing jong ki. Ha ka sngi ba ki pynlong ia ka jingkhawai naduh dangstep ki briew ki la iabun-kam ha iing ka Men Phyrnai ban ot doh ot jhur, ban shet ban tiaw, ban sait ban khlieng bad ban pynbiang lut nadong shadong ia ka jingdonkam jong ki nongbam kiba la khot sngewbha sha kane ka jingkhawai Nohmynsoo.

Ka Men Phyrnai bad u Woh Jibon ki long ki briew kiba im ha ka rep ka riang bad ki long ruh kiba minot bha ha ka kam ka duk. Kumta ha kane ka kper kaba heh bad kaba iar jong k₁, lah ban shem ia ki jait jynthung ba har-rukóm ia kaba ki thung ki tep ha ki aióm, kum u Krai, riéwhadem, u Neiliéh, u Nei-iong, u syingmet, u Syingmakhir, u Rynsun, u Piat, u Shyrmit (Shynrai) u Phankaro, u Phánlieh, u Phandieng, u Phanli (Salahli ha ka ktien Labang) u Phankdait (Salah Kdait) u Presbin ba bunjait, u Tohtung (ba shet tungrymbai) ki wang ba bun jait kum ka Wangphyrni (Wangpanai) Wangshriew Naka, Wangshriew- kwai, Wangiong, Wangshriew khon-nian, ka Wangmoo, Sohmynten, Sohmynrít (Samrit man -Labang), Sohbaingon, Sohshaw, Sohkhia, Pathaw, Pathaw iwbiéh, Pathaw shimon, u Klong shetjhur, u Klong (Klong tongum) u Tohja (rymbai ja) u Jangew, u Jathang, u Jamerdoh, u Sohngang bad sa kiwei de ki jait jhur kum u Lapuwi, ka Iarem heh, Iarem rit, ka Iamahek, u Iaiang, u Iaiur, u Jyllang, ka Salendem, ka Latynsah, ka Pylleindaku, ka Sohlaphiah, ka Sngadlakymbu, Tohtari (babun jait) bad kiwei de ki jait jhur.

Ka Samla Labang

Ha kane ka kper jong ki, ki thung ruh ia ki soh ki pai kiba laiphewjait laiphew har-rukum kum u Sohshram, Sohpieng, Sohtaintli, u Sohlane, Sohpyrdong, Sohsaniriang, Sohnamtra, Sohjew, Sarmat, Salong, Sohbah, Sohpriam, Sohsakhne, u Sakhalain, Sohthylliang, Sohsatat, Sohsynle, Sohsuit, Sohlasarmi, u Sohlyngngi, u Sohliia, u Sohshang, u Sohbrap, khlem da khein ia kiwei de ki jait soh kum u Sohsaludong, ki Sohshiah babun jait bad kiwei de ki jaitsoh. Nalor kine don ruh bun jaid ki dieng ki Siej, kum ki Rang, Shlo (Shlaw), Rathem, Skhen-knap, Siej-iong, Siej Thri, Tyr-a, bad kiwei de ki jaitdieng kiba phuhsyntiew bad ki tiewdieng ba har-rukum bad ki syntiew khlaw ba bun jait.

Ka jingdon jong ki diengsoh kiba har-rukum bad ki Syntiew ki skud ki ba laiphewjait laiphewsker, ki khring ia ki Thabalieh bad ia ki Ngap ba bun jait kum u Luwai (Luwe ha ki Labang) Rapiang (jait ngap), ki Syon dieng, Syon khyndew (jait ngap kibarit)-Rasluin ha ki Labang-Nongphyllut), ki Syon (kiba don sni bad ki bymdon sni) Luwesangia, ki Dkhi, ki Dkhaw, Ngap-riang, Ngapiali-ur, u Phyrngat, u Synhen, ki Jawkiad (Kynja ngap), Ngap Klong (Kyienklong) Ngap thiahsngi, ki Ngapsla, Ngaptung, Tkhi iong, Tkhisaw bad kiwei de ki jait Ngap bad ki Thabalieh babun rong kiba ha la ki jait ki jait, kiba wan kjit umbang umthiang na ki syntiew ki skud kiba don ha kane ka kper.

Ka jingdon jong ki Sohkhlaw kiba laiphewjait, kum u Sohbliat iong, Sohbliat saw, Sohli-ia, Sohsynle, Sohot, Shshiah, Sohlang, Sohlatdem, Sohdienglaha, Sohlattynsah,

Ka Samla Labang

Sohlatar bad kiwei de ka khring ia ki sim ki doh, kum ki Lyngdkhur jyrngam, Ladkhur-saw, Ladkhur-sangia (jait longdkhur kiba rit), Paitpuraw (Laroit) jyrngam, Synriang saw, Labadur (jait longdkhur kiba heh) Rakhlaw-lich khlieh (white head birds), Rasoikdat, Rasoiwamon, ki Langlit, ki Tuta, ki Titpu bad kiwei de ki jaitsim.

Ki jingdon ki dieng ki siej bad ki Sohkhlaw ha kane ka kper hateng hateng lah ruh ban iohi ia ki Mradkhlaw kiba wan bamsohdieng, kum ki Skei Tyrkhang, Skei-pangam, ki Shriehsaw (Shriehwasoo), Shriehiong (Shriehwaiong), ki Tngaw (Tngoo), Huleng, ki Padersnieh, ki Risang, ki Pshad, ki Phaidong, ki Iapwiang, ki Hulu (huleng) bad kiwei de ki jait khnai kum ki Nilein, ki Nitur, ki'Naituh, ki'Nairynsian (jait khnai kiba rit) bad kiwei de ki jait khnai. La iathuh ruh ba lah ban iohi man ka sngi halor ki Diengsning, Diengkya, Diengjri kiba don ha kane ka kper ia ki kynja khlieng ba bun jait, kum u Khliengkok-klir, khliengiong, Khliengshakar, Khliengdhoh, Khliengshyrtung, Khliengkit-tylli kiba apthap bad kem ia ki sim ki doh kiba wan bam wan puhsoh na kane ka kper. Shuh shuh halor ki diengjri lah ban iohi ia ki Ryngkoknor, ki Ramaknah kiba wan bam Sohjri khlieh ka sngi ha kane ka kper. La iathuh ruh hateng hateng wat ki Dngiem. Ki'Niangbri (Sniang khlaw) ki Diengkhit, ki Brai lah ban shem ba ki wan bam Sohot, Pathaw, Shriew, Phankaro, Phandieng ha ka por step bad por janmiet ha kane ka kper. Nalorkata kane ka khlaw ka khring ruh ia kiwei de ki jait khniang kum ki Shawkok, Niangkongwieng, Niantyrshang, Niangtaser, Nianglartham, ki kongweng kiba ud kiba pah baroh shisngi.

Ka Samla Labang

Ki Nongiaid lynti kiba dei iaide na rud kane ka kper kim banse ban sangeh shiphang arphang ban peitkai ia kane ka kper bad kiba kit jingkit ban shongthait pynjah jrem shipor arpor lane shikyntien Kwai ban peitkai ia ka jingitynnat kane ka kper bad ban peitkai ia ki Ngap bad ia ki Mrad bapher bapher kiba wan mih wanher sha kane ka kper. Ki Ngap kiba pher kiba wanher na shatei na shathie na sha mihngi bad na sha sepngi kiba wan kjit Umbang Umthiang na ki Syntiew ki Skud jong kane ka kper bad kiba suh kylla pat sha la ki Sympa sha ki rudwah ka par Wahmyn-I, Wahmynriang bad sha ki 'Lawbah lawsan barben jong ki 'Lawkyntang ka Ilaka Nongphyllut. Dei ha kane ka iingtrephlang kaba don ha kane ka kper ba ka Men Phyrnai Lyngdoh bad u Woh Jibon Sulip ki la kha ia ka khun ba marwei jong ki " Ka Kordor ".

Ia ka Kordor la kha hamar basdang kynrong ka sngi (sdang mihnsngi) ka long ka khynnah kaba la kha bhasngi, ka babha briew kaba kat ka jingbha briew kaba la palat liam ka jingbha ban ia kiwei pat ki khynnah jong kane ka thain Labang-Nongphyllut. Ka dur ka dar la kumba oh, ka snieh-doh kaba saw hoin-hoin la kum u Sohlyngngi uba la ihbha, ka khmut ka khmat kaba wandur kaba wandar rymmuin, u Sñiuh uba lam sawstem rongksiar, ki kti ki kjat kiba dap doh, ki khmat kiba phyrnai, ka khmut kaba jrong itynnat la kumna shniah (stah) da u paintali, ki rmiangshyntur kiba stang bad kiba saw kumba tah lipstick, ki Shympriahkti-shympriahkjat jong ka ki long kiba wandur wandar bha, ka ryngnieng ryngjot kaba jrong, ki bniat kiba-ni-lieh itynnat. Kumta baroh baroh kiba ju iohi ia ka, ki iaroh ia ka

Ka Samla Labang

jingbhabriew jong ka, kaba la palat liam ia kiwei pat ki khynnah jong ka Ilaka Labang-Nongphyllut. Katba nangmih ki snem katta ruh ka jingbhabriew jong ka la nangjur bad nangwandur arshah.

Kumba ki la kha bha-sngi ia ka, kumta ruh naduh dang khynnah ka long kaba pher bak-ly-bak na kiwei pat ki khynnah bad katba ka nangheh nangsang ka nangpynjanai ialade ha ka akor bad ka burom. Naduh dangrit kam ju kyliang ktien wat (shikyntien) shisien ruh iala ki kmie ki kpa lane ban iamai, iania bad la ki parakhynnah ne bad ki marjan marpa Ki lok ki jor ki marjan iing marjan-sem ki sakhi ia kane ki ju ong “ Ba kim ju iohsngew wat tang shikyntien ba kan kren eh kren khor bad ban kren khlem akor ia ki lok ki jor, kiba marjan iing marjansem, ia ki kur ia ki jaid, ki kha ki man bad ia ki Nongleit Nongwan kiba dei iaid lynti na jan ka kper jong ki.

Ka Kordor ka la wan na ka iing ka sem ka baduk hynrei ka long ka iing ka sem kaba donburom, kaba tipbriew tipblei, kaba kylluid bad kaba sbun mynsiem. Namar ba ki long kiba duk, kumta ki kmie ki kpa jong ka ki hap ban leit trei man ka sngi ban kamai jakpoh da ka jingthmu ban ioh ban pynsuk iala ka khun ba-marwei jong ki hadien habud. Namar-kata kam iohlad ban leit skul kum ba ioh kiwei pat ki khynnah. La iathuh ruh ba ha kata ka por kim pat don ki skul pule kumba long ha kane ka juk mynta, hynrei la katta ruh la ong ba don hi ka jingleitskul, ha kaba ki Nongsikai (Nonghikai) ki hikai ia ki khynnah da ki dak da ki shin kum

Ka Samla Labang

kaba phah khubor da u Kyrwoh-thri, kampud kamsam da kaba teh da u Phlang bad kumta ter-ter.

Naduh ba ka la sdang ban tipbriew ka la hap ban peit bad sumar ia ka iing ka sem. Hateng hateng haba wan donkam ki briew ia i mei i pa jong ka, wat la kim lah ban iakynduh ia ki, ka Kordor ha ka rta kaba dangrit ka pynshah skhor biang biang ia ki jingdonkam jong ki. Haba ka iakren bad ki, ka kren dathew bad ia ka jingkren jong ki, ka da pynshongnia kaei kaba dei bad kaei kaba lait. Ka long ka khynnah kaba pariah ktien hynrei haba ka iakren bad ki briew ka kren suki jai bad kam ju pakhet (iaknieh) ktien haba dang kren kiwei.

Ki Nongleit ki Nongwan kiba wan pan-um ban dih pynjah ia ka jingsliang jong ki, ka Kordor ka ai ia ki thik-thik katba ki kwah, kam ju khnium lane pynrankhmut, hynrei barabor da ka khmat ka bakhuid bad kaba phuhsamrakhie bad basbun mynsiem ka pynpaw ha ki. Ha khmat jong ka ym don kiba duk ym don kiba riwspah, ym don kiba khraw ym don kiba poh ym don kiba lehkhuid ym don kiba lehtngit, ha ka hi baroh ki long kiba iaryngkat kyrdan. Kane ka jinglong bymniew shiliangkhmat bad babha jong ka, ka tapkhlup bad ka pynlong ia ki briew baroh kiba leit kiba wan ban ieid kylliang ia ka bad ban iaipyrtto-sah ia ka jinglong babha jong ka. Ka Kordor nalar ba ka long kaba bha briew kaba tipsngi, sa ka akor kaba bha, ki briew kiba dei iaid lynti narud ka iing bad ka kper jong ki, haba ki la iohi ia ka kim lah khlem da kyrtiangdien bad peit-ieid ia ka. Kito pat kiba la iakynduh kam bad ka, kim lah khlem da iaroh “Ah ka khun tipsngi ki briew”.

KYNROT HALA KA KAM IING KAM SEM_KA TREI KA BENG.

Ka Kordor naduh ba ka la sdang tipbriew ka ha, khmih nadong shadong ia ka kam iing kamsem. Ki khun ki briew haba ym don kmie don kpa ha iing bunsien ki iabyrngia ka shongkai myllen ne ialehkai bad la ki paralok hynrei ha ka Kordor pat te em, ka bun kam ha kaba pyndep ia ki kam iing ki kam sem bad kam ju byrngia than eh ha ka iashongkai ne ialehkai. Kane ka jinglong babha jong ka katba ka nangheh nangsang ha ka rta ka nangpyntbit bad pynjanai shuh shuh ia la ka jinglong jingman bad ka jinglong sngewrit. Ka tip bha ia ka jingthait jingrem ki kmie ki kpa kumta kam ju pynwit ia ka thiah ka dem jong ki. Man ka step mar iariew u 'Iarnyngkong kam nangthiah nangdem shuh. Ka khie joit na jingthiah, ka shim ia ka Mluh bad u rnga, ka shut bniat, ka bta-khmat bad ka sad ka khyllong. Nangta ka sliewding bad sdang sa ka shetja shet-jyntah khnang ba i mei i pa kin ioh bam ba kin dup lah ban lait trie leit ktah dangstep. Ia ka jasngi ka Janong, ka Mluh, u Sohmynten, u Neilieh-u Neiliong (ba la tylliat bha), ia u Rynsun, u Jyllang ka thep ia ki ha u Trop-ja. Ia u Kwai, u Tympew, ka Lynniang (Wathang ha ki Labang-Nangphyllut), ia u Ingmakahir bad ia ka Shun ka thep ha ka Pdok ka Kynjon (Pla-rit) jong ki khnang ba kin nymklet.

Haba la thoh "Uba thoh" (thoh shun ki blei) ka Kordor ryngkat bad ka jingsneng jingkraw kaba paka na la ki kmie ki kpa kumta ka tip biang-biang la ka kamram. Kumban

Ka Samla Labang

shu ong noh katban shai ka pyrtnei ka la ih ka Ja ka Jyntah lane ka la ihja ihjhur. Mar iadep ka shet ka tiew, ka shim ia ki Ktang (Tyndongum da ki siej) ka thep ha khoh (Khara-um) bad leit tongum na pungum jong ki hi kaba don ha kper. Ynda la wan tongum tongwah, ka plie-sem ia ki Sniang ki Syiar, sdang sa ka sar ka pynkhuid (lumpshem lumkyndur) ia ka Kyndondhari (veranda) ia ka Pshem, ia ki Shangkiar-ki Lymmiah (ki rud ki kiar jong ka iing) ia ki Duid ki Kharai bad ia ka iing ka sem hi baroh kawei. Ka long ka khynnah kaba smat kaba sting ban trei ban ktah bad kam sngewtynnatt ban shu pynsepei ia ka por. Ka tang shu iohsngew tiak ba la khie thiah i mei i pa, ka iehnoh dak ia kaei kaba ka dangleh ka rung sha lingshetja ban tiew Umsha ia ki nangta bud sa ka aija aijhur ba kin ioh leit trei leit ktah dangstep. Haba shim ia ka jingdep kam jong ka, ka Kordor kam don por ban shongthait shongklikti lane pynsepei la ka por khlem da pynkhih la ki kti la ki kjat.

Tang shu la leit, ki kmie ki kpa jong ka sha jingtrei, ka Kordor ka sdang ban trei ia ki kam iing kam sem. Ka sait ka khlieng ia ki khiew ki Pliang, ki Pela bad ia ki ki Siang. Nangta ka sar ka pynkhuid ia ki kamra, ka niad ka pynkhuid ia u pum-pum, ia ki Snurthapbawa bad ka buh ryntih ia ki tiar ki tar, ia ki Lyngknot (Knor), ki Mula (Mura) hala ki jaka. Haba ka la iohi ba u Khaw u la jan-lut na u Shang na u Khri (ba ki ju buh ia u khaw ba kin shetja) ka tong ka khat ia u Kba na u Thiar u Tyllu, ka sei ia u Shylliah u Thlein ha phyllaw ha pshem bad that ia u haduh ba un da rkhiang bha. Hadien ar lai kynta haba u kba u la eh, ka sa

Ka Samla Labang

kynrih bad pynkhlad uno u Met uno u Stait bad ka sa sdang pat ban dungkhaw. Tang shu dep dung shisyndon ka peh ka pynkhuid bad ka sa buh ia u khaw ha u Shangbuhkhaw. Ia u Skam u Pysit ka pynlang shijaka ban dup ai bam Sniang bam Syiar. Ia u Skum u Stait ka khat bad leit theh ha ka jaka thehniut kaba don hapoh kper jong ki khnang ban iohsboh ban thung ban tep. Ia u Thlong u Synrei ka buh ia ki ha kyndong ha ka jaka ba ju buh ia ki man ka por. Ia ki Shang ki Khri, ki Maleng, ki Shalani (ki Shang ki Prah) ka buh ia ki halor tynger ba kim ym pyut bad lait na kaba soptit (phuhlangtit).

Ka Kordor kam ju shong-kli-kti ne shong-jaipdeh. Haba duna kam ka dung ka peh, ka sait ka pynkhuid ia ka iing ka sem. Nangta ka jied ka khylliap bha ia ki Jain ki Nep. Ia kiba khuid ka thep ia ki hapoh u Trop u Japi, ia kiba tng'it bad jakhlia ka buh ia ki hapoh ka khoh- ka Dabor ban leit sait ia ki sha Wah. Ha ka por ba ka lum ka lang ia ki jain ki nep, ka da peit bniah kino kiba dangbha bad kino kiba la jot la pei. Ia kiba jot ba pei ka suh ka syrdep ia ki, khnang ban ioh phongtrei i mei i pa jong ka ne ba kan phong ialade hi ruh ha ka por ba ka puh ka dain bad ka kara ia ka kper ka prah.

KA JINGMINOT IALA KA KAM.

Hadien ba ka la pyndep ia ka kam iing kam sem ka shongthait shiphang arphang (shipor arpor). Nangta ka shim ia ka Wait-bnoh (Waitmyndor) bad ia u Mohkhiew ka rung sha kper bad ka sa sdang ban puh ban dain. Ia ki lyngkhot lyngkhai ne ki salit thri, salit skhen, ki salit Rasat, ki salit Tnger ba bret u kpa ha ka por ba u thain khoh, thain Shang, thain Khri thain Kriah, thain Khara (khoh kit um) thain Star bad kiwei de ki jait jingthain ka khur ka pynlang ia ki Eit-Syiar, Eit Sniang ka khur ka pynlang shijaka khnang ban ioh sboh ban thung ia ki jhur ki jhep ba bun jait tang shu dei ka por thung por-tep hadien u ‘ **Lap-pyr-em** ’.

Ia ki jhur ki jhep ki syntiew ki skud (kiba dangshu dep thung) ka Kordor ka ai um ia ki. Ka pynkhuid ka khur ka pynlang ia ki slaiap, ka kdiah ka pynkhein ia ki tnat ki shiang kiba la iap, ka seh ka thung diengshynram ban pynwah ban pynpur syntiew bad ba kin seisoh bha, Namar-ba ka long kaba smat kaba sting, kumta ka pynlah ia ka ban pyndep kham kloi ia kano kano ka kam ba ka la trei.

Ka Kordor ka bang bad ka sngewbha ban trei ban ktah. Kam sngewtynnat ban shu shong jaipdeh kumta kaba bun hi ka por ka trei ka ktah la ha kam iing kam sem, ha ka dung ka peh ne ha ka puh ka dain ha kper ha prah. Lah ban kylli halade balei sha ba ka Kordor kam ju shongkli-kti lane ban shu pynleh nohei ia ka por ?. ka jubab ka long ba ha ka hi lada kam khiih kam ksar kam trei kam ktah, u Ksuid un

Ka Samla Labang

wan ban pynshat pynking ia ki jingmut jingpyrkhat jong ka bad lah ban mih ki jingpyrkhat khyllah kiba lah ban pyntroin bad pynjot ia ka jingim ba shisur bad ba synlar jong ka. Teng teng haba ka la sngewthait ka ju pynlut por khyndiat khyonsoit ban iashongkai bad iathuh-khana bad la ki parakhynnah ba dangkhie samla (ki theilud). Nangta pat bak ka leit ban pyndep ia ki kam ki jam ba dangsahteng.

Ha ka por nohphai-sngi man ka sngi ka Kordor ka sangeh noh na kano kano ka kam ba ka trei Ka pynlum pynlang ia ka Wait ia u Mohkhiwka saitkti saitkijat bad nangta ka sa sdang ban shetja shet jyntah (shet ja shet jhur) khnang ba ki kmie ki kpa jong ka kin kin ioh bam ja miet, haba ki tang shu wan na kaba ki trei ki ktah. Ha ba la dep ka shet ka tiw, ka sdang ban ai bam sa ia ki Sniang, ki syiar ba kin dup ioh ban bam bad ban puh ha ka por ba dangshai ha shwa ba kan set sem ia ki.

Haba la pynmyllien, ki Sniang ki Syiar ruh tang shu nohphai sngi kine ha phyllaw ha kyndur (beranda) kek-kek, kuk-kuk, krep-krep, khruk-khruk ba ki ia ap ban ioh jingbam na kti ka Kordor. Kito pat ki Sniang ki Syiar kiba don sha kper kham pajih na Pshem (phyllaw ing) ki tang shu iohsngew ia ka sur ktien jong ka Kordor kiba khot kiba ting ia ki, ki ia march bad her pynstet sha ba ka don. Ia ki Sniang ka aibam aisa ha Yangkhoi (shyngoid) ia ki Syiar pat ka ai bam ia ki ha phyllaw ba kin ioh ban bam ban puh kat ba mon.

Ka Samla Labang

Katba ki Sniang ki Syiar ki dang ia bam jingbam, ka pat ka lum ka lang ia ki Jain ki Nep ia kiba ka la that ha phyllaw. Ia kiba la rakhiang ka pyndoh ka khylliap, ia kiba dang jhieh dangsngem pat ka buh ia ki ha Dabor-dieng ba kan ioh thad pynrakhiang pat ia ki ha ka sngi kaba bud. Mar iakem iongrein ki sniang ki Syiar ki la iarung sha la ki sem shwa ba ka Kordor kan rung sha iing ka da leit peit leitkhmih bad set pynskhem bha ia ki sem jong ki, khnang ba ki Mrad ba bun jait kiba ju pyniap bad bam ia ki Sniang ki Syiar kim ym iohrung bad pyniap ia ki. Tang mar shu-rung shapoh iing ka leit ban tiew umkhluid khnang ba ki kmie ki kpa jongka kin ioh ban btha (bta) khmat bad saitkijat saitkti haba tang shu wan na Bri.

Shwa ba i mei i pa jong ka kin poi ha iing, ka la dep pynbianglypa ia ka umsyaid ba kin bta khmat bad ban saitkti saitkijat ha Kyndondhari (Baranda) harud ka Dabor Umsyaid, ka la buh ruh ia ka Nup, u Sapiangrah (sohpairah), u mawkyrshut bad ia ka jain-niat ba kin dup ioh ban niat pynrakhiang ialade shwa ba kin rung sha iing. Katba ki kmie ki kpa ki dang iasaitkti-saitkijat, saitkhmut- saitkhmat, maka pat ha iingshetja ka pynsyaid Umsha ba kin ioh dih pynjah-sliang shwa ba kin bamja. Katba ki dangdihsha, maka pat ka pynsyaid ia ka ja ka jyntah khnang ba kin nymbam jajah-jatngam.

KA LONG RUH KA KHYNNAH KABA RIEWBLEI

Ka Kordor ym tang ba ka long ka khyannah kaba tipsngi, kaba minot ban trei ha ka kam ka duk, hynrei ka long ruh kaba sheptieng ia u Blei bad ka ju duwai phirat man la ka sngi. Man ka sngi ka tang shu khie naba thiah, ha Beranda (veranda pdeng) ka pyndaitlang iala ki shympriakti ka sdang ban nguh ban dem, ban duwai ban phirat da kaba ong “ Ah Trai kynrad Me Uba-lah Uba-iai, u Nongbuh, u Nongthaw, u Nongp ynlong, u Nongpynman, u Nongbuh u Nongshna ia ka longbriew man briew, u Nongker u Nongda, u Nongsngeng u Nongkraw, u Nongpyndap u Nongpynbiang, to nangto na bneng to nangsngeng nangkraw, nangker nangda na u Ksuid na u Khrei, u Dusmon, u Siar, u Nongshun, u Nongbishni, to nangkyndat nangkynting ia ka jaituh ka jaisngi, ia ka thait ka jrem sha krem sha kroh shaba sep ka sngi sha ba ngen u bnai. To nangaibor aisor ko trai-kynrad ia i mei pa ba kin shait kin khlain, iarap ruh ia nga Ah Blei ba ngan im-hok im-khuid ban koit ban khiah, ban kamai ia ka hok ka sot, ban im tipbriew ban im tipblei, banlong ka jingiaroh bad ka burom ia me (Trai-kynrad). To nangpynbha ia ka rep ka riang ka thung, ka tep, nangpynroi ia ki Sniang ki Syiar ba ngi la ri la sumar to nangda nangker ia ki na u Khlieng, ka Tyngap, na u Krong u Khla, na u Myrsiang, u Ksar, na ki Khnai- ki Bsong bad ba kin nangroi man ka sngi, khnang ba ngin dap ngin biang ka jingbam kaba hala ka

Ka Samla Labang

sngi. Shi- hajar nguh ". kumne man ka sngi ka sdang da kanguh ka dem da ka duwai ka phirat ha u Blei Nongbuh Nongthaw bad kam ju sdang la ka trei ka ktah khlem da kyrpad blei shwa.

Man ka step kam ju pep ban pyndaitkti bad demngon ban pan jingiarap na u Nongbuh Nongthaw ba kan dep la ka trei ka ktah ba kan shait kan nang bad khiahkrat. Ha ka juh ka por ban lait na ki jingpynshoi basniew ba bun jait bad na ki jingpyrkhat khyllah ka ainguh iala U Kynrad Uba la iarap ia ka ha ki por baroh. Uba da Uba ker bad pynlait ia ka na u Ksuid u Khrei, na ka jingpang jingshitom bad na kano kano ka jingsniew ba kynsha bad na ki jingruma khnang ba kan dup ioththiah bha baroh shimiet bad ban dup lah ban khie ha ka por kaba biang, ba kan dup lah ban pyndep la ki kam ki jam bad ba kan lah ban iaroh bad ban ainguh iala u Nongbuh Nongthaw kham bha na kawei ka sngi sha kawei ka sngi. Ka kyrpad ruh ba u Blei Un ri Un sumar bad iarap ia ki kmie ki kpa jong ka.

Ka jinglong ba palei bad ba tipblei jong ka, ka paw ha ka por ba ka bam ka dih. Ha shwa ba kan bam ka da duwai da phirat. Kam ju bam shwa ialade wat shi sapit ruh khlem da pynhap sohkaw shi symboh arsyymboh ha tbian ha madan, kum ka dak ka jingtyrwa ha u Blei Nongbuh Nongthaw, u Nongri Nongsumar, u Nongbsa u Nongbsiap, u Nongpyndap u Nongpynbiang ia ka jingbam bad ia ki jingdonkam jong ka baroh hala ka sngi.

KA JINGLONG BADON-AKOR JONG KA

Ka Kordor ym tang ba ka long ka khynnah kaba bhabriew hynrei ka long ruh kaba don-akor. Haba ki lok ki jor jong i mei i pa jong ka, ki wan donkam sha ki, kam ju iashongkailang ne sngap lorni ia ki jingiakren iakhana jong ki. Ka shu pynbiang ia u Kwai u Tynpew (Pathi) khnang ba kitei ki paralok kin iabam pathi bamKwai , nangta bak ka leit ban pyndep iala ka kam. Hateng-hateng haba wan shongkai ki Samla-shynrang, ka iashongkai bad ki shiphang arphang hynrei kam ju shong slem lane shongmiet shongsynia. Ha ka Kordor hi ka sngew ba lada shongmiet than te kan nym lah shuh ban khie thiah ha ka por kaba biang bad ka jingmih na kata ka long ba kan nym lah ban pyndep iala ka kam hapoh ka por ba la buh ba ka dei ban pyndep ia ki. Ki Samla samhoi kiba wan shongkai kim shlan ban shongmiet dierpor ne ban kren danda phanda bad haba ki kren ki dahap pyrkhath arisien bad ki da thew kumno ban kren hakhmat jong ka. Ka ruh ka burom ia ki bad ka pynphaiktien da ki kyntien burom shongsbai khnang ba kin nym sngew-eiei namar ba ka bun kam kumta kam lah ban iashongkai slem bad ki. Kaba slem eh shikyntien arkyntien kwai lane shisien arisien dihduma. La katta ruh ka mynsiem jong ki ka shlei bad ka jingmut jingpyrkhath jong ki, ki her sha ka namar ka jingbha briew, ka jingsmat jingsting bad ka akor babha jong ka. Ka mynsiem jong ki ka kyndeh bad ka pluh haduh ba kim nangsuk ban thiah ban dem khlem da wan mih teng-teng ban wan peit wan khmih ia ka dur ka dar ba bhabriew bad ia ka jinglong babha jong ka Kordor.

Ka Samla Labang

Jait ba la kha bha sngi ka Kordor, katba nangmih ka sngi ka nangheh nangsang ha ka-rta, ha ka akor ka burom, ha ka ktien ka thylliej ha ryngkat ka jinglekhkuid bad sumar pran (sumar-met sumar-phat). Katba nangmih ka sngi ka nangmihdur mihdar arshah bad nangbha briew shuh shuh. Ki Ngap kiba sawhoin-hoin la kum u Sohlyngngi uba la ihbha, ki ramiangshyntur kiba dapdoh, ki bniat kiba ni lieh itynnat, u sniuh uba lam sawstem rongksiar, i khmut iba nep itynnat bad ki khmat kiba phyrnai ki la nangkylla rong bad itynnat arshah. I surktien iba jem jai-jai, ka rynieng ka ryniot kaba biang bad ka jingdon-akor kaba la ioh ia ka jingiaroh na baroh. Na khlieh haduh kjat ka la long shisha ka khynnah kaba la wandur nadong shadong. Ka long ruh ka khynnah kaba bitriam. Ha ka hi shimet kano kano ka riam, ka kup ka sem ka long kaba wandur wandar suda. Ki briew kiba iohi ia ka Kordor ki ong ba ka long kurn ka Syntiew-Latuthin katba nangshoh ka sngi katta ka nangsawtyrha, kumta ruh ka Kordor katba ka nangkhreh samla katta ka nangmihdur mihdar arshah.

Ki Labangwah kiba dei ia id lynti narud kane ka kper sha Iewkhainduli lane ki Labangneng kiba hiar sha Labangwah haba ki iohi ia ka Kordor bad ia ka dur ka dar bhabriew jong ka kim lah khlem da iakren ia kylli, ia tohkit ia ka jait ka khong bad ia ki kmie ki kpa jong ka. Da shisha ka dur ka dar bha briew bad ka akor babha jong ka, ka pynshohbiej ia kiba iohi ia ka. Ki samla shynrang bad ki jingmut jingpyrkhat jong ki ka her sha

Ka Samla Labang

ka bad haba thiah haba shong ki phohsniew bad kren ruma. Ki riew rangbah pat kim lah khlem da tied shadem bad kren hapoh Jade “ Ah kha shwa i mei ia nga ” bad yn dang myntoi aiu shuh ba yn dang kylli dangtohkit shaphang jong ka. Ki tymmen ki longkmie pat kim lah khlem da kren iaroh “Ani’ ka khun ki brieve”, phui-ske.

KABA DAP DA KA JINGSNGEWLEM

Ka Kordor ka long ruh ka briew kaba dap da ka mynsiem sngewlem iala ki para briew. Haba ka iohsngew ia ka jingud jingnam bad ia ka jingiam jinglynniar jong ki briew, ka lungmysiem bad ka pangnud namar jong ki. Bun sien ka iehnoh la ki kam ki duk bad leit jngoh leit iarap ia kito kiba shem lanot da ka mynsiem sngewlem bad ba dap da ka jingisnei.

Ki kmie ki kpa jong ka bunsien kim lah ban iabeh iatur sha ka kam im kam iap lane sha ki kam khawai dawai namar ki long ki nongbylla sngi pynban ka Kordor ka tur la ha ka iap ka sa, ha ka iap ka im, ka pang ka jhia, ka shitom ka shipa ha ka jaid ha ka kur, ha ki kha ki man, ha ki marjan marpa bad ha ki lok ki jor. Bunsien haba jia ka jingiap ki trai iing kim tip shuh ban pynbiang ia ki jingdonkam kiba bun dei ha kum kine ki khep ba ka Kordor ka pawkhmat bha la ha ka shet ka tiew, ka tongum, ka sait ka khlieng, ka kynrud kwai, ka khylliap tympew bad ka otjhur otdoh. Ha kum kine ki jingjia ki samla kynthei kine kymbrum, pynban kim shlur ban tur sha khmat bad baroh baroh ki ap bad kylli na ka Kordor ka-ei ka kam ba kin iatrei lem. Ka aikam aijam ia ki bad ki parasamla kim ju kyntait ban leh ia kiba ka la aiti ha ki ban leh, namar ki iohi ia ka mynsiem trei shitom bad iaka jingkitkhia jong ka ban leh ia kiei baroh, kiba donkam ban pyndep. Wat la ki jingkitkhia jong ka ha ka kam ki lok ki jor ha ka iap ka sa pynban kam ju klet ban pynbiang ia ka jingdonkam ki kmie ki kpa jong ka ha la ka iing ka sem.

Ka Samla Labang

Kat kum ka riti ka dustur jong ki Labang, shisien ba ki la wan na ka iing kaba iapbriew, ki hap synreit um ialade (tang ha kiba dangsah ha ka niam u barim) na khlieh haduh kjat ha shwa ba kin rung sha la ki iing ki sem, khamtam eh ha shwa ba kin leit thiah leit dem. Lada wan pat na-ba iapmynsaw te ki hap ban pom da ka pyllengsyiar khnang ban lait na ka mynsaw ka mynsnam (ia kane ki leh tang kito kiba dangsah ha ka niam u longshwa manshwa) ki dang leh ia kane haduh kine ki sngi. Haba iap mynsaw dang bun ki briew khamtam kiba dangdon ha ka niam u longshwa manshwa kiba kiar ban leit sha kum kine ki jingjia. Hynrei ka Kordor pat ka thom naphang bad ka leit beit sha kano kano ka jingjia ba sngewsih la ha ka iing ki para-kur, ki kha ki man, ki marjan ki marpa bad ha ki lok ki jor. Ynda ka leit phai sha la iing ka pyndep ia ki rukom ba dei ban leh baroh bad ha shwa ba kan thiah kam ju pep ym tang ban synreit um na khlieh ha kjat hynrei ka da sum artat.

KA LONG KA KYNNAH KABA LEHKHUID BAD BA SUMAR MET

Ka Kordor ka long ka briew kaba lehkhuid bad kaba sumar iala ka met ka phad man ka sngi hashwa ba kan leit thiah ka da sum shwa bad shwa ba kan thiah ka da sleh da kyllan khlein Ryngkohknor (Kohkarang-Horn Bill) lane da ka khlein Ramaknah (Pipe horn bill) ia ka khmut ka khmat, ki kti ki kjat bad ia ki mat ki pung Ki jain ba ka phong ruh ki long kiba khuid bha, kam ju phong jain haduh ba kin da tngit bad shitom ban sait. Hadien ba ka phong shi sngi lane arsnagi eh ka bujli noh da kiwei bad ka sait noh ia kiba ka la dep phong. Ia ki jain ki kmie ki kpa jong ka ruh kam ju shah ba kin phong bun sngi lane haduh ban da smashit, tang ar sngi ba ki phong ka la sait noh ia ki bad ka la ai da kiwei nat ba kin phong. Ka ing ka sem ruh ka long kaba khuid bha narnar ba ka long kaba smat kaba sting ban sar ban pynkhuid ban niat ia ki pum-pum bad ban pynkhuid ia ki snur Thab-bawa. Ia ki paralok kiba wankai sha iing jong ka, haba ki leit phai ka ju leit on ia ki haduh shyngkahkhim (khyrdop-gate) bad hadien ba ka la khang ia u Lar u Mynnoh (gate) ka sa leit phai sha iing. Ia ka jing don akot jong ka ka paw ruh haba wankai ki lok ki joi lane ki samla samhoi ba kam ju phah ba kin leitphai ha ka dum ka lyngngoh hynrei da u Kseh da ka prew ba kin tbeh ba ioh kin ur kin btuit ha lynti ha synkieng.

Ki khanatang ki iathuh ba ka jingkhuid ym tang ha ka dur ka dar, ka khmut ka khmat, ha ka riam ha ki jain ba ka-

Ka Samla Labang

phong hynrei hapoh iing hapoh sem ha ki khiew ha ki pliang, ha ka Beranda, ha ka phyllaw bad ha ka kper ka prah. Ka kper ka prah jong ki ka long kaba heh bad kaba iar pynban ka long ka bakhuid bad kaba itynnat da ka jingshatrong ki syntiew ki skud kiba har-rukum (laiphewjait) kiba puh itynnat bad kiba pyniwbih suhsieng ia ka iing ka sem jong ka. Ki bried kiba dei ia id lynti narud kane ka kper kim lah ban shu ia id lait kumto khlem da sangeh ban peitkai shiphang arphang ia ka jingkyndud sur ki Ngap, ki luwai, ki Sim, ki doh kiba wan kiba leit bad kiba kyntiap kjit umbang umthiang na uwei u syntiew sha uwei pat.

Ha kane ka kper nador ki soh ki pai kiba laiphewjait laiphewsker, ki syntiew ki skud kiba har-rukum hala ka jong ka jingsmaibih, kiba pynshoh-beij ia ki Nongleit Nongwan ka long u syntiew Latangjo, u 'tiewmahadei, u syntiew - dongphur bad kiwei de ki syntiew jyrmi kiba pur kiba snoh ha ki dieng ha ki siej kiba don sawdong kane ka kper. (U Syntiew-latangjo, u syntiew-mahadei bad u Syntiew-dongphur ki dei ki jait syntiew kiba don ka jingsma iwbihi kaba jur bha, ha kaba ki kynthai ki ju tynsat ha ki pankhyllong haba ki leit sha ka shad ka kmen ne sha ki jingkhawai dawai kiba heh. Ka jingsma-iwbihi jong kine' ki syntiew ka long la kat ka jingsmaiwbihi jong ki umphniang iwbihi jong ka juk ba mynta).

KA LEIT LUM LEIT WAH

Na trai jong u Lum-Saranthu mih laitylli ki wahduid bad kita ki long ka wah Umpani, ka wah Umsuwe bad ka wah Pyrda. Baroh laitylli kine ki wah ki bym dajingai na shnong Deinkynthong. Ki long ki wah (streams) kiba ki Dohthli, Dohkha, Dohjai, Dohpyrthih, Shalynnai, ki Shersyngkai, Dohsynki, Makur, Dohthli stem, Dohthli Pyrthoh, Dohthli-jyrngam, ki Dohlun, Dohkymphriang, Dohshymprong, Dohkhaktung, Dohkhasaw (barit), Dohtham (tham siar), Dohtam-salen (rong lamstem), Dohtham-maw, Dohtham krem (ki jait tham kiba heh bad kiba lam iong ka snep) bad kiwei de ki jait doh-um. Ka Kordor wat lada kam ju ioh por ban leit barabor sha lum sha wah kum kiwei pat ki paralok jong ka ki ioh. Hynrei hateng hateng khamtam ha ka por synrai, ka aiom kaba ki samla samhoi ki ju ialeit ban tong Shersyngkai ka ruh ka ju leit bad haba ka leit kam ju wanphai thylli tang ka Ruh, hynrei bunsien hi smain ha ban da dap ka Ruh. Haba ka tong kam ju tong ruma rutit kumba tong kiwei maka ka da peit ka da sylli kiba kumno ki sanium kiba shong-doh. Ha ki por leit lum leit wah ruh lah ban iohi ia ka jingsbun bad ia ka mynsiem sngewlem jong ka ia kiwei pat. Haba ka iohi ba don ki paralok kiba shah brut (bym ioh eiei) ka shim ka sei napoh ka Ruh lajong bad ailem ia ki namar kam kwah bad kam suk hi ban iohi ba ki paralok jong ka kin lait phai thylli sha iing sha sem.

Teng-teng pat ka Kordor bad la ki paralok, ki ia leit lum ban leit kheit tit kum ia u Tit-tung, Titlaliang, Titkjat-

Ka Samla Labang

Syar, Titkdait, Titsiej, Titshnong, Titrathud, Titnai, Tit-thed, Titja, Tit-thowaliap (u tit uba heh bad jem bler-bler), Titkymbu, Titlakhar (ka tit kiba shait mih tang ha ki Dienglakhar), Titsning, Titkymbukhla, (kynja tit kiba shait pynlong dawai ruh haba ingding) bad kiwei pat ki jait Tit kiba bit ban bam. Teng teng pat ka leit kheit jhur khlaw kum ia u Jangew, u Jathang, u Iaiang, Jamerdoh, Jarain, Iaremwhaian, Iamahek, Iaiur, Ialatham Latynsah, Pylleindaku, Iajaw, Wangmo, Wangkyr-yiat, Salaphiah bad kiwei de ki jait jhur khlaw. Ka Kordor haba ka leit wad jhur-khlaw kam ju wad kumba wad kiwei kiwei ki paralok jong ka tang sha ki jaka pdenglum. Hynrei maka pat ka ngam shapoh khlaw ban ioh ia ki jaitjhur ba bun jait. Ha kum kine ki khep ruh don hi ki paralok jong ka kiba shu ioh salit khyndiat khyonsoit ki jhur katba maka pat shikhoh dakit iapar. Namar ba ka long kaba sbun bad ba sngewlem ia kiwei, ka shim ka sei na khoh lajong bad ailem ia ki paralok kiba duna. Kane ka mynsiem sbun bad sngewlem jong ka Kordor ka pynlong ia ki paralok jong ka ban ieid, ban sngewnguh bad burom ia ka.

KA JINGLEHNIAH BAD KA RIAM KA BEIT

Hapoh ka thain Labang, Ilaka u Doloi Nongphyllut, ki jinglehniam kiba kham kongsan ki long, ka Phur-nohlelaw, ka Bamja Tyngkong, ka rahshyiang bad ka Phur-rator. Kine baroh laitylli ki long ki jinglehniam na ka bynta kiba iap ha shwa ban thep ia ki Shyiang jong ki hapoh ka Mootyllein ka Mootymmoh (ki Mawbah ne ki Mawthepshyiang). Ha kum kine ki jinglehniam, ka Raij ka Muluk ka shim ia u khrong u Tri, u Synniang u Bynhei tang na ki long iing longsem kiba iaideit iaideit ryntih ha ki kam shongkha shongman, kiba iashong tang para ba iaideit kynsai. Hynrei na ki long iing ki longsem kaba ki khot ha ka ktien Labang, ki walaisnem, ki walai paruid, laipasan, ki walai Nia, lai beikha (kiba shongkha bad ki pakhynnah....) kum na kine ki iing kim ju shim ia u synniang u bynhei. Ka long iing long sem jong ka Men Phyrnai bad u Woh Jibon ka long kawei na ki long iing kaba dangbat pyrkhing ia ka rukom shongkha shongman ba dei ban ia shongkha tang parakynsai, kumta ha ka khrong ha ka tri ha u synniang u bynhei, u shyllap u shylliang jong ka Raij ka Muluk, kim ju pep ban khrong na ka iing jong ki bad maki ruh kim ju pep ban iashim bynta ha kiba kum kine ki jinglehniam.

Ka sngi Phur-rator ka long ka sngi kaba khraw ha ki long iing longsem kiba iaideit ka niam ka rukom. Ha kum kane ka sngi kaba khraw kiba don ba em ki riam ki beiteit bad ki kup ki sem da ki khor ki khriam ba remdor, kum ka

Ka Samla Labang

Ryndia, ka Muka, ki Kpiengksiar bad kiwei ki jingdeng ba kordor. Kiba kham duna ka ioh ka kot ki riam ki beit katba ki lah ban ioh. Ki Rangbah pat ki pyndonkam da ka Phali ka Iuspong (Jainspong), ki Kpieng Monmala (ki Kpiengksiar kiba heh kiba shong khap-khap bad ki Paila) bad kiwei de ki jingdeng ba-kordor bad ba remdor.

Ha kum kine ki sngi kiba khraw ba ki pyndep ia ka niam ka rukom kat kum ka hukum, ka long ruh ka sngi pynirong ha ka riam ka beit bad ha kaba kum kane ka sngi kiba riewspah ki sei ia ki jain ba remdor bad pyndonkam ha kum kane ka khep. Ki 'theilud kiba duk pat bunsien ki hap ban pan kylliang ia ki jingriam jingbeit na ki paralok kiba don kiba em khnang ban iamih iapaw ha khmat kiba bun kiba lang. Ka Kordor pat wat la ka long ka Samla kaba wan na ki long iing longsem kaba duk, hynrei kam ju khuslai ka hun ha ka riam ka beit lajong katba ka ioh ei. Namar ba ki long kiba duk, kumta kam don jingdeng jingphong kiba remdor, la katta ruh ha shwa ban mihlum ha ka Phur-rator, ka da pynbianglypa ialade bad ia ka riam ka beit jong ki kmie ki kpa jong ka, ka da kyllan ia ki da ka khlein Ryngkohknor (kohkarang) khnang ba kin khuid bad phyrnai bha. Kum juh ia ki jain ki nep ba phong u kpa ka da pynbeit bha bad ia ka waitlyngkai (Waitlam) ia ka Stieh ka da shut ba kin khuid bad itynnat bha. Ia ki Tdong ki Rynniaw, u Symphui u Symphiah jong u kpa ka da pynkhuid bha ia ki, khnang ba ynda mih u kpa jongka ha ka shat ka pastieh ba un iphuh iphieng bad phyrnai bha. Ka Kordor kam ju iapan kylliang ia ka riam ka beit hynrei ha ka riam ka beit baduk

Ka Samla Labang

basuk lajong. La katta ruh ka phuh ka phieng namar ba ka long kaba bhabriew tam hapdeng ki 'thei-samla, hapoh ka thain Labang, Ilaka u Doloi Nongphyllut.

Hapoh Ilaka Labang-Nongphyllut kawei pa kawei ka iing kaba hap u khrong u tri ne u synnjang u bynhei ka dei ka kamram jong ki ban iashim bynta ha ka suit ka shor ka iatheh ka iaphlai ia u shyllap u Shylliang, u shiliang u shiphiah u kwai u tympew, ka ladaw, ka laphiah (kait-laphiah) bad kiwei de ha ka tyllein ka tymmoh jong ka kur ka jaid na ka bynta ki mynsiem kiba la khlad-noh kum juh ka mane-khlong (sam kiad sam harak sam sidhiar) ia ki Ma ki Woh, ki Sankni sankpa, ia ki Sankur - Sankmai ki Rangbah jong ka rajj khamtam ia u Kni Waheh jong ka kur ka jaid (u Kni Rangbah duh jong ka kur) kum juh ia ki Ma, ki Woh, ki Hymmen ki Para, ia ki kharim, khathymmai, ia ki Paruid ki Pasan (Pasan-Pakhynnah) bad ia kito baroh kiba dang don jingiadei. Ha kaba kum kane ka jingiashim bynta, ki para-ratap para rabi (kiba dang iadei rta) jong ka Kordor, hala ka riam ka beit Muka-Ryndia baroh kiba la don khun donkti suda bad kiba la ringsti ka sniehdoh hynrei ka Kordor pat wat ha ka riam paidbah kane lymphuin ha ka dapdoh ka khmut ka khmat, ki kti, ki kjat bad ka met ka phad. Haba ka iaidei mane klong na uwei u kni sha u wei pat baroh baroh kim lah khlem da pynbud khmat ban ioh peit ia ka jingbha briew, ka jingkhiathew, ka jing-don akor bad donburom jong ka.

Ki paralok ba ia ryngkat rta jong ka baroh kiba la don khun don kti suda, ki la ringsdot ka dur ka dar, ki la mih ki niangmang (langsnam ki ngap) bad ki la i-iawbha. Hynrei

Ka Samla Labang

ka Kordor pat lymphuin ka dapdoh naduh khlieh haduh kjat.
Ki briew kiba iawan shim bynta ha ka phur ka siang haba ki
iohi ia ka (kordor) baroh baroh ki iashat-khmat sha ka bad
kdew kti sha ki kmie ki kpa jong ka haduh ba ki ruh ki la
sngewkhyllew ban ioh ia kum kane ka khun kaba la iaroh
bad pynbud khmat da baroh.

LASHEI U NAM JINGIEID IA KA KORDOR

Ki sngi ki taiew, ki bnai bad ki snem ki iaidei sted, khlem sngewthuh na ka jinglong khynnah ka Kordor ka la poi sha ka jinglong theisamla. Ki Samla shynrang kiba najan kiba najngai kiba rung kiba mih khlem da kutla kum ka Sympangap. Ki kmie ki kpa ki ap ba kan kynjoh ktien ba kan seng bad tei noh iala ka longiing longsem, phewse lada ap katno katno ruh kam shym la kynjoh ktien satia. Namar ba kam pat ibha iano iano ruh lane lap ia u samla briew uban iadei dur iadei dar bad ka. Na ka liang ki kmie ki kpa haba ki la iohi ba ki para rata jong ka ki la ioh khun ioh kti lut, ki la sdang ban duh jingkyrmen bad ki la pyrkhat lynda ka Kordor kam pyrkhat bha lah ban duh jait. Ka Kordor kam ipatiaw ne pyrwa eiei ruh ban shim noh ia ka kyrdan longkmie. Hynrei jar ka bhah ka bynta ba la buh u Nongbuh Nongthaw, pleng dang don hi u Samla briew ba na ka shnong Madan-Um-i, u khun phrangsngi jong ka Men Tudiah War uba kyrteng u Paila bad u long uba bha-briew bha, ia uba ki briew kim shym la put turoi ia ka jingbha shynrang, jingkhlainbor bad ia ka jinglong babha jong u.

U Paila u la long u Samla uba la pura bha, uba la dap 33 snem ka rta, u briew u bym ju mih na shnong na thaw, uba demkhui ha ka rep ka riang une kynjrem jlis dang ha iing kmie ban peit bad sumar iala ki kmie ki kpa, ia ki para bad ia ki pyrda de. Ha la shnong ha la thaw, kumba ka shnong Deikynthong ka iaroh ia ka jingbha briew, ka jinglong babha, jingdon akor bad ha khmat jong ka, ym don u duk ym don u

Ka Samla Labang

riewspah baroh ki long kiba iaryngkat kyrdan. Ki Samla ki samhoi, ki khynnah ki khunlung, ki riwkynthei, ki kup shiliang, ki sem shiliang bad ki rangli ki juki baroh ki ia sngewshngain haba don ma u. Kane ka jinglong babha jong u, ka la pynlong ia ki nongshong shnong bad kito kiba iadei kam bad u ban ieid bad burom ia u.

U Paila wat la u la don la 33 snem ka rta pynban ym don ba tip ba ithuh ia u lait na ki parashnong parathaw, namar um ju mih na la shnong. Ha ka snem 1858, jaid ba dei ba ki phurnohleiw na ka iing i Meikha jong u, te kumta u la shim bynta kum uwei na ki Nongshad-pastieh ha ka Phur-rator. Ha ka sngi ba long ka Phur-rator, u Paila u la iphuh iphieng bha ha ka riam shadpastieh jlis ha ka Spongmuksa, ha ka Jingitynnat ka sniehdoh, ha ka jingphuh samrakhie lynter rymmuin, ka khmut ka khmat kaba wandur wandar bha, kynjnum i khmut iba nep itynnat bha la kum ba stah da u Paintali bad shisien ong hi u la long u samla uba bhabriew la kumba oh nadong shadong (la kum u 'naikhatsaw-synia). Ha kata ka lypung u la long u briew uba bhabriew tam na baroh ki 'rangsamla ba don hangta. Ki briew kiba iohi ia u ha kata ka jingpastieh, kim lah khlem da kylli da pyrthew, u dei uba nangno, u khun jongno bad u dei na ka jaid ka kur jong no. ki 'theilud kiba iohi ia u, ki la shu peitseh ki khmat bad ki 'menkmi ki la shu tied shadem bad thapthnga (thapshyllangmat) ba ym long shuh ba yn dang ia kylli ia pyrthew namar ba la dier ka por bad noh ka rta.

Ka Kordor kaba don ha kata ka lypung Pastieh Phur-rator ka tang shu la iohi ia u Paila, ka shadem jong ka, ka

Ka Samla Labang

kyndeh bad ka jingsngew ba khluid ki skhor bad ki ngap jong ka ruh ki khluidsaw-hain hangta hangta hi ka la sngewthuh ba ka ieid ia u. nangta ka la thew ka la woh, ka la bishar bha bad u long u samla uba iadei dur bad ka. Wat la ka la tip bad sngewthuh ba ka ieid ia u hynrei kam nud ban khlei ne iathuh hala ki kmie ki kpa, lymda u Paila u pynpaw ia ka jingieid jong u ia ka.

Hadien ka Phur-rator, ka jingbha briew bad ka main shynrang jong u paila ka la saphriang ha kylleng sawdong hapoh ka Ilaka Labang-Nongphyllut ka Kordor naduh ba ka la iohi ia u Paila kam naniohthiah iohdem shuh, ka mynsiem jong ka, ka her satang sha u. Kumta ha kaba khatduh kam lah shuh ban kun tang halade hi khlem da pynpaw iala ka mon hala ki kmie ki kpa.

Haba la buh bynta u Nongbuh-bynta u Nongsam-bynta ba kam long kaba bha ba u ne ka briew ban sah marwei, kumta ha kawei ka sngi Iew Umwasoo (Umbasaw) katba ka Kordor ka dang ap ia ka jingwan jong ki Nongdie Dohkharang (smoke fish) na Dawki ha kawei ka dukan ba die khapuria, hamar kata ka por la wan thied khapuria u paila na kata ka dukan. Katba u dang kylli dor, kynsan kynsan ther u slap bad u phria uba jur. U Paila ban lait na ka jingmysaw bad na ka jingjihieh u la phrung bad thynnian ialade shapoh kata ka dukan ha kaba ka Kordor ruh ka don hangta hynrei katba u slap bad u phria ki nangjur kumta u nang thynnian ialade shapoh ka dukan bad ynda la jem u slap bad u phria, ki briew ki la sdang ban ia mih iwei hadien

Ka Samla Labang

iwei pat dei ha kane ka por ba u la iohi ia ka Kordor ha kyndong jong kata ka basa diektung. U ruh mar iohi ia ka u la sngew tied jur u klongsnam jong u bad hangta hi u la sngewthuh ba u la lap ia ka briew ba u la iaiwad la kham slem mynta. Hangta baroh arngut ki la shu iapeit ieid iwei ia iwei pat. Haba la rang u slap bad u phria baroh arngut ki la mih na kata ka dukan hala ka jong ka jong ka thied ka pet.

U PAILA BAD KA KORDOR

Hadien ba la rang u slap bad u phria hynrei ka suinbneng te ka khriat bha. Kiba bun ki dukan die-Ja die-Sha ki la lap ba kloï bad khangnoh, lait satang ka Dukan u Thlun. Ka Kordor kaba la jhieh ki jain na ka jingjaw umslap ha ka basa die ktung ba ka riehslap ban pynsyaid ialade ka kwah ban dih-noh da ka Sha kaba syaid ba kan dup syaid. Kumta ka rung bad ka dihsha ha dukan u Thlun. Katba ka dangdihsha une lymphuin u Paila u briew uba ibha mynsiem, ba i jemnud, uba jemktien bad uba phuhsamrakhie lynter. U Paila ruh u tang shu iohi ia ka Kordor ka la pynshohbiej ia u ym tang ba ka long kaba bhabriew hynrei ka surkren jong ka ruh ka long kaba sngewtynnat bha.

U Paila katba u dangpeit ia ka Kordor, ka jingbha briew jong ka ka nangjur bad u la iohi ba ka long kaba biang nadong shadong, naduh khlich haduh kjat. Kumta u la rai hala ka mynsiem ba un pynkut noh ia ka jinglong samla jong u bad ban iashongkha noh bad ka Kordor lada ka bad ki kmie ki kpa jong ka ki mynjur ia kaei kaba un sa tyrwa ha ki. Dei ha kata ka dukan sha jong u Thlun ba ki la sdang ban iakren bad ia kylli ruh iala ka kur ka jaid bad la pynithuh ialade iwei ia iwei pat. Wat la ki dei ki samla briew (Rang & Theisotti) pynban haba ki iakren pynithuh ialade kim sawkyrang shuh naba ki la ihbha ka rta.

Jait ba dei na kajuh ka lynti Iew baroh arngut ki iamih bad ia iaidlang. Ha ki Labang kiba dangbat pyrkhing ia ka

Ka Samla Labang

ain ka riti ka dustur, kiba dang ri kyndong ia ki 'tien sneng tienkraw' u ma u woh, haba dang ia samla briew ki dang ia iaidkiar ka buddien budphrang. Wat la ka long ka lynti khlaw kaba ma pynban ka Kordor hi ka bud thop shithop nadien u Paila. Shwa ba kin ia khlad sha Madan-Um-i bad sha Deinkynthong, ka Kordor ka la ia kynduh bad la ki para marjan shnong na Labangwah kiba shu iadep bam jasong na shnong Mynriah.

Ka jingiatreilang ka Mariang lyngba u slap bad u phria, ka la long ka jingia kynduh kaba shohmynsiem ia u Paila bad ka Kordor. Ha ka jingleitphai jong ki sha la ka jong ka shnong, ka Kordor lynter lynti ka shu kynud ia ki jingrwai samla. Ia ka jingkmien jong ka, ka Kordor kam shym la lah shuh ban buhrieh, ka tang shu poi ha iing ka la iphuh ipieng ka dur ka dar bad ikmen artat. Ka Kordor ka la iathuh "Mei, Pa, hynne ha Iew nga la ia kynduh ia u Paila ha Basa ktung bad ha dukan Sha, ngi la iohlad ruh ban pyniaithuh ithaw iwei ia iwei pat; ngi la ioh ruh ban iakren ban iakhana ban ia kylli ia ka jait ka khong, ia ka shnong ia ka thaw bad u Paila u la ong ba un sa wankai sha iing jong ngi. Haba nga la bishar ia kiei kiei baroh te ngam artatien ban ong imat u la don jingmut ia nga kein mei/ pa " la phla hok ka Kordor.

" Nga sngewkmien shibun kein khun ban ioh sngew ia kine kiei kiei ba phi la iathuh bad ngin duwai ngin phirat ba u Blei Un pynurlong ia kane ka jingsngew jong phi " la phai ktien ka Men Phyrnai bad u Woh Jibon. Ki kmie ki

Ka Samla Labang

kpa jong ka Kordor ba kim kwah ban duhjait na ka iing ka sem jong ki, ki la nanglur ia kine ki Tyllawding ba kin nangrhem bad nangskhem ha ka jingiaieid. Kane ka juh ka jingsngew na ka liang ka iing ka sem jong u Paila. Ka Kordor wat lada ka la ithuh ithaw bha bad u Paila ha dukan Sha u Thlun ha Iew Umwasoo pynban ka ap dngong ia ka jingpyni pynkdew ka kmie u kpa kiba long ki Nongialam bad ki Nongbtin lynti ia ka lawei jong ka bad hadien ba ki la ia sngewthuhlypa hala rympei shikmie shikpa bad shikhun ki la rai ban leit ia kynduh ia ki kpa jong u Paila.

Kumba dei ka dustur ha ka thain Labang-Nongphyllut, wat lada ka kynthei briew ka iapmat ia uno uno u briew ruh, pynpaw ym lah ban pynpaw ia kata ka jingieid da ka kynthei, lymda u shynrang la ne ki kmie ki kpa jong u shynrang ki pynpaw nyngkong ia ka jingieid ia ka. Ha ka sngi kaba bud ka kmie u kpajong u Paila ki la wan ia kynjoh ktein ia ka kmie u kpa jong ka Kordor bad pynpaw ba u khun jong ki u Paila u don jingieid ia ka Kordor. Ki kmie ki kpa jong ka Kordor kiba dangwad dang it ia u Paila, u long u briew uba kumno ioh yn babe pat ka khun jong ki. Ki shu jubab pynhun ba kin dangwad jingmut shwa na la ka khun.

U Paila uba la raikut ban pynkut iala ka jinglong samla ha ka Kordor, u la pynpaw ha khmat ka kmie u kpa ba un sa wad briew noh katba dangim ma ki bad kyrpad ia la ki kmie ki kpa ba kin leit kynduh biang ia ki kmie ki kpa jong ka Kordor bad ba kin ai ka jubab kaba biang ba un thikna.

Ka Samla Labang

Ha ka jing ia kynduh ki shikmie shikpa jong ki arliang mamla, hadien ka jingkylli jingiatohkit, la shem ba ym don kano kano ka wit, ka wa, ka arliang, ka arphiah, ka pakhar u klong u Skaw bad ha kata hi ka sngi ki la ia pynbeit ba ki khun jong ki kin iapoikha ha ka hok kat kum ka hukum bad la iabuh sngi ruh ban iapynhap synjat-lator kat kum ka riti ka dustur kaba la saindur da ki Sainpyrkhat jong u longshwa manshwa.

KA PYNHAP SYNJAT LATOR

Shwa ba kin ia poikha ki arhang mamla ki la tabuh ia ka por ban ia khangkwai ia u samla bad ka semla Ka por khing kwai ka long ka por ia ki arhang mamla ban tohpor ban ia u nih leit iathuh shala ki kur ki jaid ki kha ki man bad iak ki lon ki por ba ka kha / u khun jong ki kin iapoikha poiman man ha ka hok bad ka burom Ka por khangkwai ka long ruh ka por ha kaba ki arhang mamla ki pynkhreh ia ka hang ka hang ban pyndong ia ka jingkhawai kat kum ka jinglah jong ki

Shi taew shwa ba ka Kordor bad u Parla, kin shini ia ka jingkyntiew kurim, baroh arhang ki la pynkhreh ia ka Harak ka Sidhiar ban roh suit rohshoi ha kata ka sugi Shisngi shwa ban leit shaw ia u shynrang (parla) ka lalong shisha ka sugi kab i-khraw ia ka longing longsem jong ka Kordor bad u Parla namar ki kha ki Man ki Kharim bad ki Khatthymmar ki kur ki Jut bad ki Lok ki lor ki Kher ki Mei ki la iawan na ka bynti lan sakha na ka jingkieu kyidan jong ki arngut sha ka kyidan lon kpa longkime

Ha ka sampyrkhat jong u longshwa manshwa u kniwaheh uba dei pyndep ia ka miam ka rukom ka thoh ka jet jong ka shongkha shongman u la lah ban tip ia ka lawei jong ki arngut tang na ki dak na ki shini jong ka miam ka rukom lyngba u Klong u Skaw, ka Harak ka Sidhiar, na ka hem ka lup u kwai u Tympew Jait ha la thoh "Uba Thoh" bad pynder Shyengkrung hi da Ma U (Blei), baroh ki jnglehnam ki long kiba raid bait raidyntih Ka hem ka lup jong u Tympew (Pathi) u Kwai ki sohlynbhar lynthiang ka Harak ka Sidhiar ha u klong u Skaw ki bha ki miat kumba ud kumba nam kumba khot kumba ting Lyngba kine ki dak ki shin

Ka Samla Labang

kiba paw tyngkrein bad la sngewthuh ba ka jingiashongkha shongman jong ka Kordor bad u Paila ka long kaba neh junom, kin ym iaphetlok lane pyllait sanshyieng lynda la pyllait na u Kynrad da ka jingiap bad ka la long shisha kumta ia ka Kordor bad u Paila.

Kine ki arngut ki la im ka jingim ka bathymmai, ki la ioh ki khun ki kti shynrang bad kynthei bad ki la im shongsuk shongsain kum kawei ka doh kawei ka snam haduh ka jingiap. Kumba long ki kmie ki kpa, kumta ruh ki khun ki long kiba tipbriew tipblei, kiba bha shynrang-bha kynthei (bhabriew) kiba bha akor ki la nangiar nangphuh u Tnum u Tyndai ha ka jingbha bad ha ka jingtiengburom ia u Blei. Ka jinglong jingman jong ki (khun) ka iadei thik thak bad ka jing ong ka ktein ka jong u Blei “ ki Soh ki babha ki sei ia ki Soh ki babha”.

PUBLISHED & PRINTED BY . SHRI M M THAIANG
AT L SHIBAI SHIBOO PRINTERS, RIATSASIM, JOWAI
